

L'ITALIE RAZISTE, O BEN: L'ORE DAI CONZ

Aromai no passe sornade che la television e duc' i miez di informazion o disinformazion dal Stât no vegnin fûr cun câs di intolerance, di malinfidense, di asse cuintri dai "forescj". E par forescj si intint prin di dut chei ch'a vegnin di fûr da l'Italie, par passâ, planchin planchin, a chei ch'a vegnin di fûr de regjon. E stant che la puritât dai vignadiz e je di riunde meridionâl (no si à mai sintût a fevelâ di un flus che di cassú al letí par in jú), ve' che a un cert pont une buine part da l'Italie si cjate cun tune brute pice. E, grate che ti grate, e jé une pice che i benpensanz le clamin razísin.

A part la grande confusion, la imprecision, la deformazion dai faz, che di un câs a fâsin un cjscjel, o pensìn che e seti une buine ocasion par lassâ di bande la retoriche, che cun chê no si cunbine nuje, e di cjâlâ in muse la realtât, cirint di no spaçâ par carognis chei che a palesin un mâl che al e. In câs, a saran carognis chei che chest malstâ lu àn inviât, promovût, judât, e che no fasin nuje par meti rimiedi.

Se dopo cent e passe agns di Italie unitarie, prime risorgjmentâl, po fassiste, po antifassiste, si cjatin denant di dôs Italiis e di un Nort che nol pó plui digjerí la invasion dal Sud, al e clâr che no si trate plui dome di une matetât.

Al è alc che nol cuadre tal mût che cheste Italie e je stade repeçade. Cjalant i faz, tocje che la unitât de spice des Alps fin `e ultime ponte di tiere-ferme a ere plui une sflocje o une inlusion o une prepotence che no une realtât. Si tratave di un disegñ politic che nol tignive cont des realtâz culturâls, storichis e etnichis. Come meti adun plui cualitâz di fasui e po scjassâ dut tun tamês sperant ch'al salti fûr il fasuli standart. Al sares stât un delit, parceche si vares staronzade dute la diviersitât e la ricjece par fâ vignî fûr une robe bastarde e sterpe.

Cumó, tune clime plui libare o plui slavrade, cualchidun al tache a di "Vonde!"

E al passe par trist dome parceche al vise la comunitât statâl dal malstâ che al è, che si lu sint in duc' e che si à pore a pandilu. O pore de religjon o pore de politiche o pore de publiche inopin. Salacôr al e rivât il moment di tornâ a clarî la cuistíon.

Che l'Italie e seti fate di int difarente no je une invenzion di chel o di chelâtri. E je une constatazion confermade de legjslazion statâl, che no ere tant cjalde pai particularísins. Parce ano fatis lis regjons? Parcè certis regjons sono a statût speciâl? E cuâlis sono a statût speciâl: chês plui vualivadis o chês là che la difarense e je plui marcade, adiriture etniche, di gjernassie, di çocje?

Cuanche si tratave di fâ l'Italie, tant de bande catoliche che de bande laiche, si fevelave di federalísins. Une idee che no si pó no cjatâle juste, par duc', ancje se la reson dal Stât o la prepotence dal plui fuart no le àn lassade madressi.

L'Italie e à une sô ricjece te diviersitât, e dome salvant la diviersitât tune unitât plui largje si pó dí che la convivense e jé positive. Se par jessi talians, ch'al e un fat prin di dut politic ministratîf, o vin di staronzâ il cjâf ai todescs e ai furlans e scurtâur lis ongulis e i pîs ai meridionâi, si capis che une Italie dal gjenar e sares une disgracie. Cjalade di ogni bande, ancje par ledros. Duncje la division in regjons e va tignude, e va rinfuarcade, cumó che nond'e plui pericui di fuarcis centrifughis. Ancje par chel decentrament ministratîf ch'al sares speli di modernitât, di maturitât e di sintiment.

La diviersitât e salte cuanche si scomence, apueste, a meti adun in forme disordinade, prepotente e ricatatorie, fuarcis difarentis. Al sares come cunbinâ un matrimoni fra int che no si ûl o che no je ancjemó preparade a vivi insieme.

Il miscliçaju par fuarce al jude a odeâsi, no a volêsi plui ben. Parceche il vivi insieme al e un ben cuanche al è cirût e bramât, no cuanche al é inponût.

Duncje un Stât al à di fâ il pussibil par che ogni talian al puedi vê la pussibilitât di vivi a cjase sô, te sô clime fisiche e culturâl. Al dà di plui parceche al è in armonie cun dute la sô storie e al sa di lavorâ par un doman ch'al e so e dai siei fîs.

Lassant la sô tiere, si cjatarâ dislidrisât e al varâ sinpri ce pierdi. S'al tornarâ cjase al varâ pierdûz i agns de "profugance". S'al restarâ lontan al varâ pierdûz i valôrs e i peams de sô tiere di riunde. L'emigrazion no jè mancûl dure fasint mancûl chilometri o passant mancûl frontieris. Chest esodo dai meridionâi viers il Nort, chest "viaç de sperance" come che lu à clamât, in realtât al à servît dome a sfurnî i paîs lajû e a ingrumâ cassû int disadatade, che si e cjatade cence lidrîs e cence pomis, distacade de sô risultive e no preparade a supâ l'aghe de tiere che si ere sistemade.

Cussì o vin viodûz paîs a diventâ sitâz, là che plui che convivense a ere grande confusion culturâl. Si lassave cori dome parceche i bassarûi a puartavin mandopare e a cunsumavin i bêz tal lûc di emigrazion. Cumó che no si à plui dibisugne di lôr, a Milan, a Turin e tes zonis industriâls dal Nort si scomence a berlâ cuintri di lôr. Ma lôr no puedin tornâ jû, parceche a ur son nassûz i fîs e i nevôz, che a si cjataressin mâl ancje tornant tes tieris dal soreli.

Chest par chel ch'al riguarde il "triangul industriâl", là che i meridionâi a son vignûz a rinpompâ la culumie adatansi a dutis lis voris e a dutis lis umiliazioms.

Difarent il câs di âtris tieris, come par esenpli il Friûl, là che no son rivâz cu la valîs di carton, ma cun tant di lauree o di diplome o di gjachete cu lis steletis. No ere une int disperade che a rivave a domandâ un toc di pan adatansi a fâ robis che chei dal puest ur puçave di fâ. Chi di nô i furlans e àn continuât a fâ i contadins, i muradôrs, i operaris, e lôr e àn cjapade in man la scuele, la ministrazion, lis puestis, l'esercit, la pulizie, i tribunâi e vie; in pratiche i puesc' di comant.

La leç ur dave dirit e par chel plui di un si à sintût in dirit di alcâ la vôs, di sbeleâ i furlans, di tratânus di biadaz e di indurmidîz. Soredut si son sintûz fuarz de fuarce dal Stât, che ur dave titui e tinbros, e no àn vût pêl di riguart par chê realtât plui vecje e plui vere de leç, che e je la int, cu la sô storie, cu la sô lenghe, cul sô mût di fâ di sigûr difarent dal lôr. Gjavant cualchi ecezion, si pó dî che no àn fate cuissà ce fadie par adatâsi. Parceche si sintivin legjtimâz dal podê centrâl E nissune istituzion, nê statâl nê gleseastiche no ur à mai domandât, in ganbio dal pan che a cjatavin, un tic di sensibilitât e di rispjet pe gnove realtât.

Cumó che il contest sociâl e economic al à ganbiât, ancje i furlans e àn tacât a domandâsi se, par câs, nol sares plui just, a paritât, dâj la precedense 'e nestre int, in non di chê diviersitât che o vin dit prime. Nissun furlan nol disarà che nô o sin miôr di lôr, ma dome un prevignût o un vendût nol viodarà la difarense, e grande, fra nô e lôr. Chest al é sucedût soredut par dôs resons che i furlans e àn tacât a studiâ di plui, e duncje il matereâl uman pai ufissis e pe publiche ministrazion al è; che i puesc' di lavôr a si ridusin sinpri di plui, e duncje ogni onp di sintiment al dîs che, a cjase sô, la cjadree j tocje prime a lul. No si pó pratindi il contrâr. Al sares catolic, ma no uman.

Ce si puedial fâ, denant di chest malstâ che di sigûr al cjaparà sinpri plui pît?

Batise par che la riforme de publiche ministrazion e cjapi sinpri di plui la dimension regjonâl, in dut. Al rint di plui, al e plui onest, e al e plui rispjetôs di chei valôrs ch'a vegnin prime de unitât d'Italie.

Pratindi che la int che si e replantade chenti a capissi che culî e jè un'âtre tiere, un'âtre int, un'âtre culture. E come che lôr, a cjase sô, a van indenant tes lôr tradizions sbonbansi de unitât taliane, cussí e àn di permeti che ancje i furlans, in Friûl, a puedin vivi di furlans, cence jessi obleâz a jessi i unics in Italie a sacrificâsi par une ideologje. Ch'a cirin di adatâsi, di cognossinus, di insedâsi in chest nestri ambient culturâl e religjôs cun creance e cun delicatece. I furlans no ju pararan fûr instes, ancje parceche a son bogns di brundulâ dome cuanche nissun no ju sint. Se invessit a ciraran di diventâ dai nestris, a cjataran ancje un bon stâ. No par nuje nol torne jú nissun. Se podopo a cjatin scrit sun cualchi mûr cualchi peraulate, al e il minim che un popul invadût e umiliât in ogni forme al puedi fâ. O din dut, si lassin puartà vie dut; no vino propit nancje di rugnâ? Alore copàinus daurman! Ma par podê dâ un judissi obietîf, si vares di disledrosâ la situazion. Tant a dî fa une leç là che i furlans a puedin invadi ducj i ufissis dal Sud. Par cumó, stant che al é vêr il contrâr, nus tocje di cjapâ il danp e lis colpîs; stupiz e trisc'. E il Stât, ch'al e il prin responsabil di cheste porcarie, al à il coragjo di fânus ancje la predicje.